

Ya Neikadwan Tudek nan John

¹ Nalpu huyyan tudek ni hi-gak e hakey ni pinilin Apu Dios ni mantuttuddu. Nakka panittudek huyyan hi-gam e hakey ni biin * pinilin Apu Dios ni pantu-u tu, niyadda etan u-ungngam. Nehammad impeminhed kun hi-gayu ey beken nak ni ebuh, nem emin ida dama etan nengulug nan Jesus Christo e makulug hu elaw tu. ² Et-eteng impeminhed kun hi-gayu tep ya tayu kapengullugin ehel Apu Dios, e humman kaumbaddang ni hi-gatsun kenayun.

³ Pinhed kun meweddan hi-gayu hu binabbal, ya hemek niya linggep ni kamelpun Apu Dios e Ametayu et hi Jesus Christo e U-ungnga tu malat meihammad hu tayu kapengullug niya panimpipinhed itsu.

Ya pengu-unnudan tayun elaw Apu Dios

⁴ Nakka man-am-amleng ni peteg ni nengamtaan kun wadadda hu u-ungngam ni kamengunnud ni intugun Ametayun hi-gatsun makulug ni elaw. ⁵⁻⁶ Pinhed kun penemnem mewan ni hi-gam eya tugun e mahapul ni man-impipinhed itsu. Tep hedin man-impipinhed itsu, man unnuuden tayun emin hu tugun Apu Dios, et

* **1:1** 1:1 Yad ehel ni Greek, endi maptek ni keibbellinan tu eya kantun "bii" di verse 1 et yad verse 13, hedin humman ey bii tu-wangu winu yadda kamengullug. Nem yadda etan kamengullug na-mu hu pinhed tun e-helen.

humman hu u-unnud yu. Huyyan tugun ey beken ni hin-appil, tep huyya neitugun ni hi-gatsu eman ni laputun nengulugan tayun Jesus.

⁷ U-unnud tayu huyyan tugun tep ay dakel ida law di kebebbleley hu mangkaheul e eleg da ebbuluta e nangkapyan tuu hi Jesus Christo. Humman idan mangkaheul ey buhul idan Jesus Christo. ⁸ Ang-ang yu ma-lat wada silbitu hu mi nantenuttudduan ni hi-gayu et dawaten yullin emin etan iddawat Apu Dios.

⁹ Emin ida etan kamengehging ni meippanggep nan Jesus ey beken idan tuun Apu Dios. Nem yadda etan tuun kamengu-unnud ni elaw nan Jesus Christo ey humman ida tuun Ametayu e hi Apu Dios nan hi Jesus Christo e U-ungnga tu.

¹⁰ Emin ida hu um-alid baley yun kamantuttuddun beken ni makulug ni meippanggep nan Jesus Christo ey entan tu hangud niya entan tu pahgep. Ey entan tu ehel ni hi-gatu hu “Melinggep ka kaya.” ¹¹ Tep hedin apngaen yu hu henin nunman ni tuu, man heni inebulut yu hu tuka ituttuddun hin-appil et mekilliwwat kayun hi-gatu.

¹² Dakel et pinhed kun ittudek ni hi-gayu, nem ay ngenamung ali ew ni ellian kudtan hu pengung-ungbalan tayu et wadan man-amamleng itsullin peteg ni emin.

¹³ Anin ida eya u-ungngan agim ni biin pinilin Apu Dios et kanday dakeyu kanenemneman hi-gada.

Ya ehel apu Dios
Kallahan, Keley-i: Ya ehel apu Dios Bible

copyright © 2009 Wycliffe Bible Translators, Inc.

Language: Antipolo Ifugao

Contributor: Wycliffe Bible Translators, Inc.

All rights reserved.

2020-11-18

PDF generated using Haiola and XeLaTeX on 21 Feb 2024 from source
files dated 29 Jan 2022

3593303a-80c2-56e4-90b2-f4bfea2fd2a6